

福建通志

第柒拾壹冊
列傳



福建列傳卷三十八

清七

陳蘭疇字贊雨一字綺石侯官人嘉慶丙辰進士改庶吉士散館授編修五年充實錄館纂修六年春充會試同考官秋充順天鄉試同考官九年補山東道監察御史巡視東城掌湖廣道權刑科掌印給事中攝街道廳事奏陳吏治首嚴考課令捐班分部學習人員三年期滿堂官徇情不甄別去留則冒濫者多而實心勤事者少必致部務廢弛銓次壅塞至外省佐雜人員閒住無資營求差遣上司勉強所請名爲辦公實則滋擾州縣官不堪酬應非刻剝小民卽侵虧庫項爲弊不少緝盜賊有司之責地方官恐干嚴議轉向事主苛求以至報竊甚於被竊胥役甚於盜賊均須嚴禁奉詔施行又以海盜猖獗提督李長庚久任水師請仍令其統兵進剿以專責成時長庚望吏議詔從之海氛以靖其監賑東城也有僧以募興修爲名砌矮屋自行圍禁號曰坐關經年累月寒暑浸淫多成廢疾蘭疇

重治之此習遂除十二年出爲廣西學政試桂林有婦人訴其子某生冤者究之得縣令受賄事奏褫令職至平樂家丁有藉端需索者重懲之自是所過地方秋毫無擾每按試扁門後盡驅差役鐃錮一室獨坐鎮堂上諸弊悉絕間有犯規舞弊者卽當堂責處不發學以杜行賄不行縣以免差擾故緣事被懲者亦皆帖服計試四府一州未竟而卒年四十六子松年道光辛巳舉人

道光舊志

邱良功字玉韞號琢齋馬巷金門島人幼孤事母孝長隸金門營爲兵乾隆六十年出洋緝匪在蘇火洋獲許江等在烏潯洋獲林鳳等又擒張春等併船獲焉拔補外委是年復在南日洋獲陳合等祥芝洋獲劉嘆等嘉慶元年隨遊擊魏成德巡洋迭獲劇盜劉三張訓王時陳明吳班等次年又獲王忠楊善等五月在祥芝外洋遇盜艇一躍登舟擒匪首莫阿三等六月在深扈廟內獲賊酋陳三貴升把總旋在永寧獲高集等在崇武獺窟洋獲曾春在將軍澳獲艇匪張阿四督撫奏請議敘奉硃批可嘉並於

良功姓名加殊圈焉良功以末弁結主知感激愈自奮其後又迭獲陳六
鄭梅梅吳秤黃克正等補千總引見擢守備是時洋盜蔡牽朱潰方橫行
海上分擾閩浙粵三洋七年良功在銅山港獲牽匪夥陳質等升遊擊隨
浙江提督李長庚在江省扁礁洋獲駱然等十年蔡牽竄擾臺灣復隨長
庚赴臺勦捕並護理臺灣副將統率師船在臺澎各洋偵緝十一年牽以
朱潰方擾北路突犯鹿耳門攻臺灣良功乘其不備以火攻之殲其眾於
洲仔尾轉由北汕與長庚夾擊牽船幾獲會潮漲逸去奉旨摘去頂戴乃
率舟師至大鵝籠進勦朱潰沉其艘又滅白衣匪於笨港牽再擾鹿耳門
良功衝陣敗之疏入上復殊圈其姓名加副將銜賞花翎逾年追朱潰於
滬尾潰東竄入鷄籠洋值潮退堵港口困之南澳總兵王得祿率舟師夾
攻擒匪首林紅等潰遁入生番界窮追抵蘇澳毀其巢敘功一等授安平
副將擢定海總兵未赴任值長庚殞於陣上念海上將材可繼長庚者無
逾良功乃授浙江提督代統其軍良功隨長庚久痛其功敗垂成以滅牽

自任十四年帶領舟師出洋督捕獲牽匪夥王鳥等偵知賊中綠頭大船牽坐艇也遇於漁山外洋良功揮令諸將擊散別船自以坐船專攻之得祿亦率閩師至連夜追過黑水洋良功股被礮傷裹創搥鼓督戰益力颶風驟起浪起復如山牽船大篷猝掛良功帆上壓船幾覆軍士多落水勢急甚猶指揮奮擊賊船壞牽墜海死其妻及餘黨二百五六十人並殲焉生擒胡有均郭淺等捷聞晉封男爵良功嘗於田畧洋面瞭見賊船戢帆追之至東機外洋風雨暴至官船賊船皆漂散良功坐船亦折斷大桅旋松槓具盡壞次日始收泊亟派兵弁沿海搜捕獲莊姜等蓋料賊船被漂必登岸修葺也十六年入都陞見回任復出巡洋獲蔡險郭魁虞煥章徐進才翁阿三葉三豹邱合發癩頭四等次年復獲陳登陳烏青施阿興蔡勝玉王有升駱阿楚孔阿三等良功遇盜不避危險坐船嘗爲賊礮洞穿水暴入兵弁皆失色而良功夷然也十八年又獲陳彩能等十九年迭獲胡時智柴武魁王文星陳祖金等二十年又獲梁成起洪啓大郭乃姐陸

瑞倫舒玉燕等二十一年又獲何金鳳陳得奇潘永光等二十二年又獲張和尚梁阿川等是春奏請述職出都於八月三十日行次甘泉縣病歿年四十九歲賜諡剛勇

成勲良功從子常從良功出洋緝匪嘉慶十四年良功追蔡牽至漁山逾黑水洋舟相比噴筒火箭迸集如雨成勲奮身格鬪中傷落海死事聞照把總例賜恤世襲雲騎尉

以上馬巷集

楊彪字上麟一字石卿甌寧人生而形貌魁偉以弓箭入伍從征臺灣林爽文錄攻克斗六門功拔補建鎮中營外委游陞延平左營千總洋匪蔡牽擾臺彪適領更班軍至臺臺鎮愛新泰檄以所將內地兵同禦賊於南路大湖解張良懷之圍賊眾累千彪部下兵僅百人由此知名又嘗隨愛新泰巡視臺郡小北門忽賊數千擁至時大兵俱營小南門外猝出不意彪請自領所部百人出城迎敵仍請飛調大隊兵策應彪奮勇擊斃賊首騎者一人餘眾稍却移時策應兵至賊乃遁下船去愛大加犒勞所得賞

資盡分與部下兵善撫士卒甘苦與同故能得其死力每戰輒踴躍爭先
欽差將軍賽上其事以守備陞用旋補臺鎮左營守備賽將軍知其有守
於是委彪行視北路形勢並案上淡水虛兵冒餉事彪以一騎一從行沿
途饋遺一切屏絕亦不需其供帳至上淡水所被議之員密送茗荈四大
匣中寘洋銀彪佯爲不知原封還之卒爲據實稟報旋委本營遊擊接署
右營遊擊牙門向有陋規彪概不受或曰乾隆年間陋規破案玉石俱焚
君誠潔已恐無以自明彪曰無私獲戾於心無愧況未必然乎歷署彰化
及下淡水都司題補嘉義都司並不受陋規如在遊署時下淡水大姓爭
田鳳山縣爲移文至營派兵監獲彪叱曰朝廷養兵爲富室收租耶及陷
以多金立斥去弗顧調補彰化都司嘗獲嘉義劫賊數十名悉推與該管
官俾復原職嗣於本境緝獲南路匪首楊良彬旋委鹿港遊擊遂題陞臺
左遊擊並有南路案將臺地富饒民輕生喜亂然尙氣服義官其地者率以
重致愛而善撫之輒感激至死不相背負先是南路閩越居民閭閻文武

官俱來鎮壓民惟彪言是聽曰是心正者言自可從及署叅將適北路海
事南路民因彪前在下淡水恩信素著相戒毋妄動所轄地安堵如常明
年墜馬傷股力請解組歸嘗過海遇風碎船幸得全痛自克責曰恐生平
有隱慮故遭此警其言類有道者

雲寥山人文鈔

陳夢熊一名大恕字章如號渭溪侯官人由行伍游升千總嘉慶元年遊
擊會攀鶴在洋遇盜淹斃夢熊等救援不力經水師提督哈當阿奏叅革
職留任十年升臺灣水師右營守備十二年粵東洋匪朱瀆滋擾夥黨分
竄閩省柑橘洋面夢熊隨提督張見升環攻轟斃賊首生擒賊匪八十餘
名奪獲器械無算十三年正月在鷄母澳外洋追捕朱瀆分竄匪船射盜
首方台立斃並擒獲夥匪二十九名三月起擢臺灣水師左營遊擊追勦
艇匪於懸鐘外洋射倒數名賊目顴骨中礮傷仍擊沉盜船一獲盜船一
生擒匪犯葉雨等三十名餘船遁回粵洋交部議敘閏五月偕署總兵官
周國泰等追勦蔡牽朱瀆幫船於宮仔等處洋面燒斃盜匪多名生擒賊

目三十一名奉旨遇有叅將缺出先行補用賞戴花翎十四年崇武外洋有朱渥等匪船越竄夢熊偕定海守備官印方等擊沉盜船一撈獲盜犯九名生擒匪犯二十五名五月補銅山營叅將六月署浙江温州鎮總兵官十五年署金門鎮總兵官先後拏獲盜首陳不洪天陳墨林助黃寶等並夥黨數百名奪獲船礮器械無數十七年升澎湖協副將二十年擢浙江黃巖鎮總兵官二十二年署温州鎮總兵官二十三年授定海鎮總兵官道光三年升廣東水師提督生平每戰所向披靡賊號爲大鵬六年以原品休致賞食全俸八年卒

國史列傳金華陳氏族譜

黃飛鵬連江人由行伍洊擢千總嘉慶二年陞定海鎮左營守備超擢中軍遊擊復擢鎮海營叅將十年總督玉德奏稱飛鵬熟諳水師緝捕出力得旨陞授副將署理黃巖鎮總兵官屢與提督李長庚會勦蔡牽殲擒多名所獲銅鐵鎗礮數十件適被礮彈擲傷腰腿交部議敘旋調碭石鎮總兵官上學鄭一黃亞有等匪船殲獲無算時喚咭喇國商船擅駛進虎門停

泊黃埔總督吳熊光檄飛鵬管帶舟師夷船徑泊城外官兵喝阻不聽飛鵬開礮嚇擊斃夷民一名帶傷三名夷船懼遂退事聞上嘉其有膽氣嗣偕提督童鎮陞等追勦盜匪於儋州洋面生擒盜首烏石二及賊目鄭耀章等賞戴花翎交部議敘調陽江鎮總兵在洋卒奏聞照軍營病故例賜恤

道光舊志

蒲立勲字希之廈門人幼嫻弓馬以伯叔俱水師官習知水師事入伍爲提督署書識嘉慶四年從遊擊林承昌獲盜塢邱洋又獲盜彭厝鄉補外委十一年海盜蔡牽寇臺灣從提督許文謨擊之鹽水港生擒蔡虎尤地又擊之竹圍尾笨港獲騎馬賊陳萬吳得乘勢毀賊寮斬殺無算獲賊夥曹恭於鳳山將軍賽冲阿壯之補澎湖把總留臺効用時蔡牽猶熾海上總統李長庚卒朝廷議代者授提督王得祿總統督閩浙舟師專事蔡牽而立勲素爲得祿所知至是選隸麾下十四年四月遇鳳尾幫賊於海壇外洋躍身過船砍取首級得祿以爲勇充巡捕左右以之八月追蔡牽於

黑水洋及之與浙江提督邱良功夾擊擲火斗燬牽船尾樓及舳牽勢窮
蹙礮無鉛彈代以番錢傷得祿額裏瘡督戰益急立勲傳得祿命拔所佩
刀斫舷大呼曰今日有不用命者死以所乘艖舳撞牽船船破牽自沉立
勲亦受傷墮海中遇救不死事聞上於名旁硃圈以千總儘先補用先換
頂戴賞銀牌擢提標中營千總十五年隨總督方維甸渡臺灣搜捕閩粵
械鬪諸犯立勲初名立芳至是始改名維甸字之曰樹亭歸署金門左營
守備十六年巡哨至平海外洋擊沉盜船一生擒盜十割耳辦各一並礮
械十八年調署提標右營守備二十二年補福寧左營守備尋署金門左
營遊擊旋實授署銅山叅將道光五年擢廣東海門叅將歷署澄海副將
碣石鎮總兵六年擢龍門協副將以母年高龍門道遠丐於總督奏調平
海副將九年保舉堪勝總兵署南澳鎮授浙江温州鎮告養歸卒年五十
有三

內自訟
齋文集

胡振聲字子容同安人父貴已有傳振聲以行伍值臺匪林爽文亂立功

積官至廣東龍門副將嘉慶五年移黃巖從總兵岳璽擒獲著黃盜首江
文授溫州鎮總兵會黃巖鎮滅水澳賊於狗洞門六年破侯齊添於披山
洋滅補網幫於東日擊蔡牽於南麂生擒其黨林照四十四人八年從李
長庚追牽幾獲之又與衆將李景曾等掩擊牽獲九十六人礮械數百振
聲所乘戰艦桐木爲之輕捷異於他舟每出常先諸將九年拔聲在竿塘
奉檄追牽望見牽七十餘艘皆所劫臺商巨艦時六月北風大發盜乘風
勢甚猛哨船咸懷畏葸振聲傳令進攻曰敢有言退者斬奮勇衝擊自未
至申斃賊甚多牽見官兵深入無援乃率新附梁山幫小船二十餘蜂擁
環攻振聲眾寡不敵立船首督戰手刃數賊旋被飛礮中項仆蔡牽與振
聲同鄉不欲害之以雞皮裹藥掩其傷振聲去之罵不絕口賊憤甚遂遇
害同被難者把總馮光陞兵丁葛錦高等共八十二名事聞詔加提督銜
祭葬謚武壯蔭一子振聲母賢每出獲寇則喜否則不許入見此次奉檄
知勢不敵致書浙撫阮元言此行恐不得生還聞者悲之

馬大賓字思敬其先回部人後爲邵武人幼樵採佐家爨以兵法部勒羣兒指揮有夙契父見之曰是兒當以武顯年十七命隸伍籍積官汀州左營把總務除民害去軍蠹回翔數汎所至舉職嘉慶十年冬海盜蔡牽驚臺灣大賓奉檄督軍東渡守禦道遇賊與鬪屢挫賊鋒得達就進干總留戍十三年春隨大將軍賽內渡遭風失道遠大軍欸遇匪艇連檣鬪進船中並商賈兵不滿百克懼且亂大賓厲聲曰毋譁其各實礮執刀無刀執木槌先擊船頭賊可死中求活及彼船近遂擊殺三賊首賊益怒以鐵鈎鈎船欲上軍民益用命持大斧斷鈎上者斷臂指臂指盈舷大賓督戰益急自晨至日昃賊傷死過當遁去大將軍與諸將望百里外礮煙蔽天欲回船救不相及而大賓已完船抵廈門大將軍酌酒賀且曰君建此功宜得上賞奈前奏報平何大賓曰餘孽耳千總不才不能盡除根株免罪已幸何敢言功大將軍益壯之尋回本任總督汪志伊以才略拔萃疏薦十

八年授龍巖守備明年權雲霄遊擊雲霄人好亂日尋干戈大賓在任稍靖屬時亢早有司祈雨無應適大賓巡海歸虔恭露禱三晝夜雨大霑喜立雨中以答天貺既而回龍巖道光三年被議奪職寓學廈門居之九年二月卒年六十爲人敦友誼喜周人急云

抑快軒文集

林廷福字錫卿一字受堂金門人有二兄隸水師官外委廷福遂從戎積獲盜功亦得金門鎮左營外委屢從師出洋殺賊最諸將嘉慶十年海寇蔡牽竄入鹿耳門窺臺灣山賊應之水陸連營互七八里矚望皆是總統李長庚徵各鎮水師刻期合勦廷福倍道至角不能進大呼薄賊營一戰沉其舟二十載百數十人得會總統於洲仔尾旦日總統會師水陸合擊廷福連弩殪紅衣賊目五人騎馬賊首一人縱火焚巢火光徹天陸賊屯聚皆盡挾眾走舟保北汕諸軍合圍牽益窘駕海潮逸廷福邀擊於東港外洋俘其黨曾藝等八十九人而還進本營二司把總已於水澳洋得牽假子蔡三獻軍門總督阿林保記其功謂漢兒能辦賊也明年正月遂從

長庚擊牽於廣東急水洋礮子從袖過不顧幾得牽適日暮風反復跳去於時與牽相犄角者朱濟廷福復屢挫之於鷄籠洋蘇澳番界洋最後十三年十二月遇諸閩粵界長汕尾洋賊處上風風急濤湧怒我舟退爲所及進不能軍軍校大恐廷福曰有進無退直指濟騰腫轟擊之潰斃第渥拔其眾遇尋降而廷福功爲帥抑不敘故官不遷十七年三月勦黃茂幫於柑橘洋戰方酣賊從桅巔擲火斗焚我舟斗及廷福足轉飛擲賊舟舟熱賊亂生擒茂黨劉貴等三十八人敘功一等進水師提標前營千總監造奉天外海戰艦駕赴金州交付摧南澳左營守備二十三年新設天津水師選將閩浙用總督董教增薦授天津水師遊擊奉裁回閩候補道光四年由海壇遊擊護臺灣水師副將屬粵莊匪徒許尙楊良彬擾鳳山卽提勁旅六百駐郡城虞非常果獲五人得僞劄乃約期縱火爲內應者旣平念餘孽竄海中少緩不可制易衣駕膨船混跡商漁得許令等十二人於清水外洋遂絕根株六年調署澎湖遊擊而臺灣彰化賊李遠焚劫北

路奉檄帶本標兵弁守西螺諸堡累擒劇賊陳願廖士元六十八人會總
督孫爾準至嚴檄捕著名賊林溜溜西螺堡甘厝莊人克驚多徒黨屢抗
官軍檄至諸將相顧難之廷福曰可餌而取也遣人語溜曰來富貴汝赦
其餘人溜有特託言歸命陰戒其黨毋散伍而身懷數刃來觀變眾危之
廷福故示不疑與道欵曲飛達總督取進止而羈縻溜以請授官印牘視
溜溜易之不爲備數日總督命斬梟符下廷福乃盛兵坐堂皇諸將控弦
露刃俟命時溜衣故衣侍顧語溜曰朝來移牒下官汝可易新衣習儀溜
趨下謝跪未起頭已落矣其徒大譁見有備不敢動並散遣之總督大喜
師旋調署福州水師叅將以卓異薦八年補烽火營叅將未上署閩安副
將卒于官年五十四

上

游化字誠伯鳳山人嘉慶間蔡牽滋擾化奉檄縋城而出募義勇守內門
官倉眾恃以安又隨總兵愛某擒獲洋匪復隨同知錢某搜山皆有功初
化以歲貢生就銓教職至是敘功加六品銜道光三年選沙縣訓導以病

歸值賊匪楊良弼亂內門路通南門化募民堵禦賊不得逞乃受縛太吏

嘉之復奏加五品頂戴年七十五卒

道光舊志

梁章鉅字閔中又字茝林晚自號退菴長樂人父上治已有傳章鉅少從鄭光策林茂春讀書學作詩賦雜文輯東南嶠外書畫錄二十卷乾隆壬戌成進士改庶吉士散館改禮部主事輯南省公餘錄八卷謝振定爲之序緝長樂詩話八卷鄉居主浦城南浦書院講席者七年緝東南嶠外詩文鈔夏小正通釋四卷南浦詩話四卷校補倉頡篇三卷在里中開藤花吟館集諸名流觴詠其中有畫卷與鄭鵬程林軒開游武夷又與全徵蘭游漁梁萬葉寺志乘所謂天下十大名山之一也嗣復入都供職乙亥同劉嗣綰吳嵩梁陳用光李彥章同謁翁方綱爲蘇齋詩弟子者三年年蓋四十有一矣次年考選軍機章京第一入宣南詩社又兩年戊寅入直軍機旋補主客司主事升員外郎充大清通禮館纂修內廷方略館纂修分纂西域圖志道光二年京察一等記名授湖北荊州府兼護荆宜施道兼